

每週經課朗誦經文(巴克禮漢羅/教羅)2012/11/04

共同經課 - 1

以賽亞書二十五章六節～九節

6 Tī chit-ê 山萬軍 ê 耶和華 beh 爲 tiòh 萬百姓用好物排設筵桌，用舊酒 kap 骨髓滿滿 ê 好物，以及坐清 ê 舊酒，排設筵桌。7 Koh tī chit-ê 山祂 beh 除去單萬百姓 ê phè，kap 遮蓋萬國 ê 布篷。8 祂有吞滅死無夠永遠；主耶和華 beh 拭去眾人面裡 ê 目屎；koh tùi 普天下除去祂 ê 百姓 ê 見笑；因爲這是耶和華講 ê。9 到 hit 日，人 beh 講，看 ah，這是阮 ê 上帝，阮平素 thèng 候祂。祂 beh 拯救阮；這是耶和華；阮平素 thèng 候祂，阮 beh 因爲祂 ê 救恩來歡喜快樂。

共同經課 - 2

詩篇二十四篇

1 大衛 ê 詩。1) 地 kap 其中所充滿 ê，世界 kap tiàm tī 伊中間 ê，lóng 屬耶和華。2 伊將地建立 tī 海 ê 頂面，安置 tī 大水 ê 頂面。3 Chī-chūi 能上耶和華 ê 山？ Chī-chūi 能 khiā tī 伊聖 ê 所在？4 就是手清氣，心清潔；存心無 òng 虛假，chiù-choā 無 khng 奸詭 ê 人。5 Chit 號人 beh 得 tiòh 耶和華賜福；Koh tùi 救伊 ê 上帝得 tiòh 義。6 Chiah-ê 是 chhē 耶和華 ê 族類，雅各 ê 上帝 ah，這是 ài 見你 ê 面 ê 人。[Sè-láh] 7 城門 ah，kiáh 起 lín ê 頭；永遠 ê 門 ah，lín tiòh 受舉起；榮光 ê 王 beh 入。8 Hit-ê 榮光 ê 王是 chī-chūi？就是大氣力大權能 ê 耶和華，Tī 交戰有大權能 ê 耶和華。9 城門 ah，kiáh 起 lín ê 頭，永遠 ê 門 ah，lín 亦 tiòh kiáh 起；榮光 ê 王 beh 入。10 Hit-ê 榮光 ê 王是 chī-chūi？萬軍 ê 耶和華，伊是榮光 ê 王。[Sè-láh]

共同經課 - 3

啟示錄二十一章一節～六 a 節

1 我 koh 看見有身 ê 天，新 ê 地；因爲前 ê 天前 ê 地已經過去；海也無 koh 有。2 Koh 看見聖城，就是新 ê 耶路撒冷，出 tī 天，tùi 上帝降落，已經備辦便，親像新娘裝飾來 thèng 候伊 ê 丈夫。3 Koh 聽見大聲 tùi 座位出，講，上帝 ê 會幕 tī 人 ê 中間，上帝 beh kap in saⁿ-kap khiā 起；in beh 做伊 ê 百姓，上帝本身 beh kap in tī-teh，來做 in ê 上帝。4 Koh beh kā in ê 目矚拭去 lóng 總 ê 目屎；無 beh koh 有死失；也無 beh koh 有哀傷，喉叫，痛疼；前 ê tai-chì 已經過去。5 坐 tī 座位 ê 講，我換新萬物。Koh 講，你 tiòh 寫伊，因爲 chiah-ê 話是 thang 信，是真實。6 Koh kā 我講，已經成 lah；我就是 A-lī-hoat kap O-bí-ka，是起頭 ê Kap 路尾 ê。

共同經課 - 4

約翰福音十一章三十二節～四十四節

32 馬利亞到耶穌所 tī-teh ê 所在，看見伊，就仆伊 ê 腳下，kā 伊講，主 ah，你若 tī chia，我 ê 兄弟就 boē 死。33 耶穌看見伊啼哭，koh kap 伊 saⁿ-kap 來 ê 猶太人亦啼哭，就真感心，koh 大 jù 亂，34 講，Lín hē 伊 tī 甚麼所在？In 就 kā 伊講，主 ah，來去看。35 耶穌流目屎。36 猶太人就講，你看，伊疼 chit 人到 án-ni！37 其中有 ê 講，伊 bat 開 chhiⁿ-mî 人 ê 目矚，kiám boē hō chit 人無死 mah？38 耶穌 koh 感心到墓裡。Hit-ê 墓是石洞，有一塊石塞 hē-teh。39 耶穌講，徙開 hit 塊石。死人 ê 姊妹馬大 kā 伊講，主 ah，taⁿ 臭 lah；已經死四日 lah。40 耶穌 kā 伊講，我 kiám 無 kā 你講，你若信，能看見上帝 ê 榮光 mah？41 In 就徙開 hit 塊石。耶穌 kiáh 目 òng 天，講，父 ah，我感謝你，因爲你已經聽我。42 我知你常常聽我；獨獨我講 án-ni，是爲 tiòh 周圍 teh khiā ê 眾人，hō in 信你差我。43 講 soah，就大聲喉叫，講，拉撒路，出來。44 死人就出來，手腳紮布，面包巾。耶穌 kā in 講，tháu 開，hō 伊行。